

Här Fernand Etgen
President vun der Chamber
19, um Krautmaart
L-1728 Lëtzebuerg

Lëtzebuerg, den 29. September 2022

Här President,

esou wéi d'Chamberreglement et virgesäit, bieden ech lech, dës parlamentaresch Fro un d'Madamm Justizminister weiderzeleeden.

A Frankräich hunn d'Prisonéier, wéi dat an der Loi pénitentiaire vun 2009 festgehalten ass, d'Recht, an hirer Zell sou oft, wéi si dat wënschen, mat engem Aumônier vun hirer Confessioun ze schwätzen, an dat ouni Iwwerwaachung.

Déi schrëftlech Korrespondenz tëscht Prisonéier an Aumônier ass a Frankräich strikt protegéiert. Siwe Confessiounen sinn a Frankräich an de Prisongen zougelooss: déi kathoulesch Aumônerie, déi jüdesch Aumônerie, déi islamesch Aumônerie, déi orthodox Aumônerie, déi protestantesch Aumônerie, déi buddhistesch Aumônerie an d'Jehova-Zeien.

Während a Frankräich, mat der Ophiewung vun de sanitäre Restrictiounen am Kontext vun der Corona-Pandemie, d'Aumônieren erëm an d'Zelle bei d'Prisonéier kënnen goen an domat e wichtege Bäitrag zur Humaniséierung vun de Prisongen a géint d'Radikaliséierung an de Prisonge leeschte kënnen, ass et den Aumônieren zu Lëtzebuerg nach ëmmer net erlaabt, an den Zelle mat de Prisonéier ze schwätzen, an dat, obschonns d'Covid-Restrictiounen hei am Land baal integraal opgehewe sinn.

Och verfüügt déi kathoulesch Prisongsaumônerie net méi iwwer eng eege Bibliothék an de Prisongen, wat fir déi Prisonéier, déi hir Relioun ausüben wëllen, vu grousem Nodeel ass.

An deem Zesammenhank hunn ech folgend Froen un d'Madamm Minister:

- 1) Kann d'Madamm Minister präziséieren, firwat et den Aumônieren trotz der Ophiewung vun de Corona-Restriktiounen nach ëmmer net erlaabt ass, d'Prisonéier an hiren Zellen ze besichen?
- 2) Wéi steet d'Madamm Minister zur Iwwerleeung, datt doduerch d'Reliounsfräiheet vun den Detenuen net méi integral assuréiert gëtt?
- 3) Ass dru geduecht, fir et den Aumônieren rëm ze erlaben, d'Prisonéier an hiren Zellen ze besichen? Wa jo, wéini an ënner wéi enge Konditiounen?

- 4) Kann d'Madamm Minister confirméieren, datt déi schrëftlech Korrespondenz tëscht Prisonéier an Aumônier wéi a Frankräich strikt protegéiert ass?
- 5) Leien der Madamm Minister Zuele vir, wéi vill "intervenants culturels" an de Lëtzebuerger Prisongen zougelooss sinn,, opgedeelt no Confessiounen?
- 6) Kann d'Madamm Minister Zuele virleeën, wat de Budget ugeet, dee fir d'Reliionsausübung an de Prisongen a fir d'Formatioun vun den Aumôniere vum Staat zur Verfügung gestallt gëtt?
- 7) Kann d'Madamm Minister erklären, aus wéi enge Grënn d'kathoulesch Prisongsaumônerie net méi iwwer eng eege Bibliothéik verfüügt an ob dru geduecht ass, déi Decisioun rëm réckgängeg ze maachen?

Mat déiwem Respekt,

Roy Reding,
Deputéierten

